

Headline	Angkasa bangunkan projek solar		
MediaTitle	Sinar Harian		
Date	30 May 2016	Language	Malay
Circulation	279,000	Readership	837,000
Section	Nasional	Page No	51
ArticleSize	153 cm ²	Journalist	N/A
PR Value	RM 4,518		



Angkasa bangunkan projek solar

KUANTAN – Angkatan Koperasi Kebangsaan Malaysia Berhad (Angkasa) akan membangunkan projek tenaga solar di atas tanah seluas 0.6 hektar sebagai permulaan di Sungai Tiang, Kedah pada November ini.

Presidennya, Datuk Abdul Fattah Abdullah berkata, projek tenaga solar melalui sistem fotovoltaiik itu dapat menjana tenaga elektrik dan memberi pulangan lumayan untuk jangka panjang kepada Angkasa.

Menurutnya, sebagai permulaan panel tenaga solar itu mendapat kelulusan Lembaga Pembangunan Tenaga Lestari (Seda Malaysia) sebanyak satu megawatt dan akan dipasang di Sungai Tiang.

“Kita akan selesaikan hujung tahun ini (pembinaan projek tenaga solar). Kita jangkakan pulangannya akan diperoleh bermula tahun hadapan daripada projek berkenaan.

“Nilai bagi pembinaan panel tenaga solar ini dianggarkan bernilai RM9 juta dan Angkasa bersungguh-sungguh membangunkan projek ini kerana pulangan diperoleh sekitar RM1.35 juta setahun menerusi kontrak jualan selama 21 tahun.

“Projek ini akan menjana tenaga elektrik melalui alat yang dipasang dan akan dijual kepada Tenaga Nasional Berhad (TNB) sebagai pemegang lesen pengagihan,” katanya.

Beliau berkata demikian kepada pem-

berita ketika ditemui selepas majlis perasmian Mesyuarat Agung Tahunan Koperasi Pengguna Pahang Berhad kali ke-38 di Dewan Utama, Wisma Belia, Indera Mahkota di sini, semalam.

Abdul Fattah berkata, Sungai Tiang dipilih sebagai lokasi pembinaan panel tenaga solar itu kerana mendapati kadar penerimaan cahaya matahari di negeri bahagian utara lebih tinggi berbanding negeri lain.

Katanya, di Kedah, kawasan pencahayaan matahari amat tinggi antara enam hingga lapan jam sehari dan kurang awan.

“Kalau di sini (Pahang) bukan tidak panas, tetapi kadar cahaya itu tidak cukup tinggi dan lebih banyak mendung dan berawan. Jadi untuk panel tenaga solar, kita perlukan cahaya yang banyak,” katanya.

Dalam pada itu, beliau menggesa semua koperasi yang berdaftar dengan Angkasa berani meneroka pelbagai cabang perniagaan lain bagi menambah perolehan koperasi mereka.

Katanya, sekiranya ahli dan lembaga koperasi tidak berani mempelbagaikan penerokaan terhadap perniagaan baharu, ia tidak mampu merubah perolehan sesebuah koperasi.

“Ahli perlu menjadi tulang belakang dan menyokong apa sahaja yang lembaga koperasi mahu laksanakan sekiranya mahu menjadi koperasi yang maju,” katanya.